

憨山老人夢遊集

憨山老人夢遊集卷四

侍者福善錄

門人通炯編輯

嶺南弟子劉起相重較

法語

示歸宗智監寺

歸宗爲古尊宿說法地達觀師倡緣興復旣而湛公竭身盡力竟還故物今廿餘年湛公化去弟子修慈荷之予丙辰夏來禮金輪舍利塔覩其寺規模甲匡山之勝因思輔弼者誠難其人衆中見禪人在智眉宇秀拔卓有骨氣因屬主者命爲監寺禪人善密行凡衆人盡日所務有不及者視其當務必通夕不寐

一一親爲料理明發則事無不辦者予嘻噓而嘆曰
有是哉予嘗見叢林年少率無慚愧一味養嬾三業
不攝禮誦不修甚至白晝安眠安肯終夜不寐身任
其勞以備大衆之務乎昔佛弟子千二百人獨稱羅
睺爲密行第一故爲佛長子此土前輩諸祖唯百丈
一日不作一日不食遂爲叢林千古典刑永明每日
行一百八事行故閻羅殿上圖像供養佛說三千大
千世界無有如芥子許不是菩薩捨身命爲衆生處
故感爲天中天是知從上佛祖無有不從行門建立
世間福田功德也禪人能以此心放捨身命荷負叢

林卽是建立三寶三寶常住卽是續佛慧命慧命不斷卽是報佛深恩知恩報恩卽是慈父之孝子矣旣秉如是行願二六時中念念諦思我自無始生死以來捨此身骨如須彌山所飲母乳如四海水如此捨身受身皆造生死苦業何曾一日以此身命修出世行乎若果有之則吾今生定不如此在凡夫地矣今幸有此身發難得之志一生盡命不捨本行則是一生超過百劫千生矣如此乃謂不虛生耳禪人從此更發精進居一切時但將趙州狗子佛性話頭蘊在胸中隨就作處心心叅究畢竟因甚道無一旦擡着

抹着一念疑團迸裂從前生死頓然了却是可謂福
慧二嚴一生取辦古人云移花兼蝶至買石得雲饒
前三十六代祖師一齊在禪人眉毛上轉大法輪也
示自宗念禪人

佛教弟子修出世法唯自利利他二種妙行利他謂
之修福自利謂之修慧菩薩發心勤求無上菩提菩
薩雖知法性空寂而不捨有爲諸行知法性空是謂
自利不捨諸行是謂利他從上佛祖未有不由二行
得出生死者是以釋迦世尊歷劫勤修難行苦行我
等曠大劫來於生死海頭出頭沒捨身受身不可思

議皆是虛生浪死何有一毛真實行門若有寔行則
定不似今生者頭面也回光返照猛自思惟豈不痛
哉禪人今幸仗夙緣早得脫俗永離苦海又得安居
名山諸祖說法勝道場地此萬劫難遇之緣正是飢
逢王膳病遇醫王自當慶幸無量卽盡此形壽拌捨
一生作此功德已勝百劫千生空過無益也禪人當
信老人言自今之後發堅固不退之心持勇猛剛強
之志盡自己色力量自己才能辦一片肯心任緣隨
願耐心耐煩忍苦忍勞卽一日成就一種功德已勝
一生空過矣禪人自說身弱神疲不能任事古人貴

在心力强願力大不在色力健不健也今雖小恙不爲大苦若造惡業墮在三途卽求今日以小病小惱之身心求作福田之利益不可得也佛令衆生思地獄苦發菩提心正是今日策發精進幢也古德云寧有法死不無法生縱捨此身命作此妙行猶爲般若舟航可到彼岸苟不勉力强志可謂虛負此生旣到寶山空手而歸豈不惜哉若能安心於無事則心空心空則神不竭神不竭則身不勞如此是爲無作妙行遇緣卽宗定不爲日用所轉頭頭成就大解脫門矣當諦思之

示陸將軍

名世顯號鎮湖

將軍爲濠梁世胄天性英傑其殺機固所賦也中年知向道入海門周先生室先生拈古人勸君識取主人公之語示之老人歸隱匡山謁老人金輪峰下自知殺業太重願求懺悔老人喜其性直無僞固古豪傑忠肝義膽之儔第古今賦此天性者多盡錯用其心故以佛種子翻作地獄苦具耳佛性無二衆生與佛不隔一毫達性衆生卽佛不達性佛卽衆生如清冷之水以之獻佛則清淨以之洗穢則污濁故佛之慈悲卽衆生之殺機古德云護生須用殺殺盡始安

居又云梵語阿羅漢此云殺賊經云與五陰魔煩惱魔死魔共戰有大功勲滅三毒出三界破魔網爾時如來一大歡喜此釋迦老子勸人殺生之榜樣也以佛能如此殺生故號大雄猛世尊世人愚癡賦有雄猛之佛性而不自殺其賊翻以殺人劫劫生生酬償地獄之苦而自以爲功多豈不爲至愚至癡倒用其佛性者哉語云一將功成萬骨枯自古罪之大者莫大於殺生其殺人以爲功殺生食肉恣口腹以爲快其愚等也將軍能回心向上自求多福從今日去以殺生之勇自殺其慾佛言貪慾瞋恚過於怨賊能自

斷之是爲殺賊能破煩惱出生死苦是爲大雄以此直求無上佛果是爲大賞其殺之利有如此者而自棄不謀可謂智乎雖然殺人則易自殺則難故云出家大丈夫事非將相所能爲老人葛藤至此是謂法施慈悲將軍信此是真懺悔

示慧成信首座

首座慧成中年棄妻孥子出家曾叅達觀蓮池兩大師乃之南嶽湖東掩關老人將卜居南嶽成破關相迎遂侍巾舄一日作禮白言某幸末法爲佛弟子志出生死親見三大師現身五濁惡世衛護法門行其

難行忍其難忍調其難調每見如來教中教菩薩法將謂空言今親承三大師之行履典刑現在便可盡形壽依皈誠難捨此別求怙恃矣乃寫三大師之真終身佩奉且生生世世執此願輪卽往來人天周流六趣曾無厭倦乞師爲我證明之老人聞而笑曰此固子之深心本願雖然似矣猶未探其本也請試觀夫本師和尚毘盧遮那法身非身以文殊觀音普賢三大士之行以成其身文殊智也觀音悲也普賢行也捨此三者則法身寂寥亦無寄矣故如來法身若言其智則徹法界理事因果乃至草芥塵毛無不盡

其源底盡衆生界心念頭數莫不徹其根源若言其悲則盡衆生數皆爲己身凡衆生之飢寒困苦疾病痛癢乃至三途劇苦皆菩薩全身一體共受故能不捨於一衆生若言其行則盡虛空徹法界無一草芥塵毛不是菩薩捨身命處故普賢十願一一皆言虛空界盡衆生界盡衆生業盡衆生煩惱盡我此行願無有窮盡是故本師毘盧遮那以此三法成就一或少_一法而法身不成卽一衆生而非自己則法身不遍乃至塵毛草芥一有不徹則未盡無明以至虛空盡處而行願亦盡則法身斷滅雖然於法界性中觀

此三者如首羅三目卽一卽三非三非一於寂滅海中猶似漚滅漚生耳若有挺特沒量大人能於毘盧頂額上行回視此三行者大似喚奴作郎矣以彼區區介爾之行較三大士者又不啻奴兒婢子豈能盡佛法身之量哉苟能從此發堅固心放捨身命建立三寶凡有纖毫禪法門益衆生事皆法界全體之德用如由一塵以遍諸塵始一毛而融多毛從今生以極未來劫劫生生不退此心亦如普賢之虛空界盡而行願無盡生生世世食息起居行住坐臥未離本師一毛孔外三大老者乃於法性海中同出同沒不

出如幻三昧逢場作戲竿木隨身說幻法以開幻衆
是則有之何足以爲師哉其無以限量心自隘如來
法身境界可也

示自覺智禪人

佛言汝等比丘每于辰朝當自摩頭此語最爲親切
老人每每思之吾佛慈悲痛徹骨髓常謂末法比丘
多所受用安居四事種種供養各各自謂所應得者
更不思我是何人物從何來爲何而受所以知恩者
希而報恩者少特未一摩其頭耳苟回光一摩其頭
則不覺自驚曰吾爲何剷除鬚髮不與俗人爲伍耶

苟知形與俗異則居不敢近俗身不敢入俗心不敢
念俗如此則樂遠離行不待知識之教而自發勇猛
入山惟恐不深矣又安忍混從市俗縱浪身心爲無
慚人作無益行耶自覺禪人向住人間來匡山禮老
人願枯心住山修出世行老人因示之以福慧雙修
之行修慧在乎觀心修福在乎萬行觀心以念佛爲
最萬行以供養爲先是二者乃爲總持吾人日用一
切起心動念皆是妄想爲生死本故招苦果今以妄
想之心轉爲念佛則念念成淨土因是爲樂果若念
佛心心不斷妄想消滅心光發露智慧現前則成佛

法身然衆生所以貧窮無福慧者由生生世世未嘗
一念供養三寶以求福德直爲生死苦身念念貪求
五欲之樂以資苦本今以貪求一己之心轉而供養
三寶以有限之身命隨心量力供養十方乃至一香
一華粒米莖菜則如滴水入滄溟一塵落大地縱海
有枯而地有盡其福無窮故感佛果華藏莊嚴爲已
將來自受用地捨此則無成佛妙行矣禪人如生疲
厭當自摩頭則自發無量勇猛也

示龍華泰禪人

余往乞食長安時過龍華樹下主人瑞庵師物色余

甚驩視猶多世親因也余覩王舍城中諸住刹者率多浮習獨師孤硬潔介遇物不假辭色心知其非塵中人也遂相與莫逆數數往來諸弟子輩亦莫不以余爲親故無間然及師化去其孫潭公視余猶視師余被放嶺外愧生平竟無以報德者頃余出嶺之南嶽法孫泰禪人遠來相訊余見之不覺五內酸痛昔之與師音聲相貌居然在目及余之雙徑了達大師因緣禪人相待旣而余歸匡山則携禪人與之同歸意念爾祖之德與成就禪人出世之業爲報地耳居期年以開荒之勞身心未及放下頃政爲禪人指示

發覺初心方有趨向乃翁以書招之屬以他緣余刻意留之不可得禪人將別請益因示之曰吾出家兒先須急其大者略其小者何謂大生死是也何謂小世緣是也古德云除却死生真大事其餘都是可商量以衆生沉淪苦海汨沒世緣積劫以來以至今日未嘗一念返省今幸爲佛弟子身着袈裟且又遇知識有人道之緣而不拌捨世緣苦心叅究已躬下事切恐今生錯過縱出頭來未審可能如今日諸緣畢具否也禪人今以乃翁之命不敢違去則固爾當以死生之念爲急辦道之緣不可失事畢旋歸老人幸

得活埋空山但存殘喘一日則與禪人切磋大事有一日之功老人以畢命爲期禪人以死心相待但得禪人當人一念光明煥發不獨禪人以了積劫生死大事亦是老人所以報乃祖之地不負此世際會因緣也禪人行矣其無久滯他鄉重增生死業累耳

示翠林禪人

佛祖教人唯在真心寔行爲出生死之要心真則凡所動作言行舉措無一事而不真行寔則凡所云爲無一行而不寔故真寔如好種子其餘作爲立行種種皆發生之緣以是之故抽芽發幹開花結寔究竟

不虛故佛說發心修行如布種子成就菩提以爲結
果果者寔也以始終皆真寔故故佛呵二乘爲焦芽
敗種者以其心行不真寔故也從上諸祖教人參須
真參悟須寔悟是知一切衆生虛生浪死者以其妄
想顛倒用事劫劫生生未曾一念真寔故於生死海
中漂流難到彼岸所謂業識茫茫無本可據耳況爲
佛弟子身在袈裟之下豈可流浪一生念念妄想業
識流轉曾無一念返省而求真寔履踐之行此乃向
袈裟下失却人身最爲可憐愍者禪人旣不遠千里
來參老人必發一片真寔信心以此空山寂寞之中

非掠虛之地何所爲而來耶既發真寔信心不是一見便了不求一段真寔之行亦徒然耳若求真寔之行卽從真寔心中發現果有真寔寔爲生死之心必須將從前有生以來及出家以來從頭一一細思檢點何曾有一念一行是真寔事從前已是空過卽從今日已去發一片出世之心將一切世間情根妄想攀緣一齊放下將此一把骨頭一齊拋却將此一條性命納向空山大澤之中任他日炙風吹一切安逸飽煖思慮盡情撇卻單單直以死生一念挂在眉毛上將一則古人公案蘊在胸中日夜參究看他一

念世間心起便是墮在生死處定要把斷不容毫髮
如此叅究不悟不休卽此一着便是爲生死真寔心
卽以此心向二六時中一切動作云爲種種行門至
禮拜三寶供養十方調和大衆看待老病一切行門
無不親身竭力承事不生一念厭倦心不生一念人
我是非得失心不起一念休歇止足想如永明大師
每日行一百八件方便行盡形不改卽此便是真寔
之行如此操心立行透出本地光明則將積劫所染
一切貪瞋癡愛習氣種子一一消融化爲成佛真寔
種子矣如是用心可謂不虛此生不負出家不枉遠

犯風波叅訪知識若仍前涉虛止作嘗情業垢罪垢
種子但隨妄想而行不唯辜負此生實取窮劫三途
之苦耳

示順則易禪人

沙門釋子乃出塵之人親近佛法乃出情之法寔破
我之具方今學者廣學多聞但增我見少能食采法
味滋養法身慧命者豈非顛倒之甚也易禪人以多
聞無益志在清修固已遠矣然徒以清修爲行而不
刻意究竟生死根株不深窮佛祖不到之地此其創
志不遠是以一日之價爲得也可不負其本有哉吾

徒所難得者厭世俗最難得者厭生死禪人今知其
厭而不知究其所以厭是猶然以五十步笑百步也
嗟予老矣餘日無多生死大患橫在眉睫恐厭之不
極禪人年亦長矣能以老人之厭自厭倘不厭老人
相與千岳萬壑之間絕影忘言修厭離行從此長揖
五濁永離四生同遊廣大極樂之鄉豈不爲最上因
緣哉又奚止于裹糧千里之適視彼榆枋莽蒼者固
未足與道也

示玄機叅禪人

禪人以持明爲專行從事者二十年心地未有發明

乞老人指示老人因示之曰佛說修行之路方便多門歸源無二卽叅禪提話頭與念佛持明皆無二法第不善用心者不知借以磨煉習氣破除妄想返以執着之心資助無明故用力多而收功少耳此事如用瓦子敲門只是要門開不必計手中瓦子何如也以吾人無量劫來積集貪瞋癡愛雜染種子潛於藏識之中深固幽遠無人能破聖人權設方便教人提一則公案爲話頭重下疑情把斷妄想關頭絲毫不放久久得力如逼狗跳牆忽然藏識迸裂露出本來面目謂之悟道若是單單逼拶妄想不行何必話頭

卽婆子數炭團專心不二亦能發悟況念佛持咒有二法哉禪人持明三十年不見効者不是咒無靈驗只是持咒之心未曾得力尋常如推空車下坡相似只管滾將去何曾着力來如此用心不獨今生無驗卽竊劫亦只如此及至陰境現前生死到來依然眼花撩亂卻惟修行無下落豈非自誤自錯耶禪人從今不必改轉就將持咒的心作話頭字字心心着力挨磨如推重車上坡相似渾身氣力使盡不敢放鬆絲毫寸寸步步脚跟不空如此用力時只逼得妄想流注塞斷命根更不放行到此之時就在正着力處

重下疑情深深覷看審問只者用力持咒的畢竟是
个甚麼覷來覷去疑來疑去如老鼠入牛角直到轉
身吐氣不得處如此正是得力時節切不可作休息
想亦不得以此爲難生退息想及逼到一念開豁處
乃是電光三昧切不可作玄妙歡喜想從此更着精
彩拌命做去不到忽然藏識迸裂虛空粉碎時決不
放手若能如此持咒與叅禪豈有二法耶所以道俱
胝只念三行咒便得名超一切人便可證明卽親見
佛祖亦不易老人之說也

示智沙彌

方今出家兒於末法鬪諍堅固之時有能決志爲生死大事單提向上一着以了悟爲期此上上根人誠不易見今亦有叅究此事又惡覺惡習濃厚蒲團未穩邪見橫生多落魔道此其難也古德云未能叅究向上且於教法留心時光亦不空過其留心於教亦有兩般一則根器稍利力竊性相宗旨深徹其源以多聞熏習之功從聞思修入三摩地是則不獨自了心性抑且爲人師此亦報佛深恩不負出家之志至若根器稍鈍不能廣親教乘卽持誦一門尤爲要行故天台大師以讀誦受持爲五品觀行之首卽法華

所說持經法師現在父母所生肉身卽得六根清淨
此持經之功豈劣行哉沙彌旣知厭生死苦投佛出
家苟無專心一行豈不辜負此生卽持經一行能專
心一志如古人潛心理觀一旦忘言契會得佛心宗
是由文字而得總持此所謂旋陀羅尼門由此證入
歷劫生死根株仗此法門一時頓斷豈不爲無上菩
提之徑路乎若悠悠歲月唐喪光陰墮於粥飯常流
豈不虛消信施重增業累又何取於出家爲哉

示性覺禪人

出家本爲生死大事今出家兒不知生死爲何物但

知隨波逐流業識茫茫無本可據古人叅方行脚訪
尋知識單爲究明已躬下事今人行盡天下歷徧叢
林唯鼓粥飯習氣竟不知善知識爲人處可惜奔波
一生到底了無下落是爲可憐愍者至有一念爲生
死心的不知修行之要或以禮誦念佛爲修行一生
辛苦到底於已躬下事如黑漆桶相似於生死分上
了沒干涉禪人發心真實爲生死大事唯有叅究向
上一着爲真實工夫先要辦一片長遠決定不退之
志古人二三十年單提一念不悟不休第一不得指
望速成就釋迦老子三大阿僧祇劫磨煉身心豈是

鈍根耶古德參究機緣儘多唯有念佛的是誰一則
審實話頭最易得力禪人今日發心參究但將此一
則公案時時提撕先將身心內外一切妄想雜亂念
頭一齊放下放到沒可放處卽深深提起一聲阿彌
陀佛四字歷歷分明急着眼看看得少不得力又提
一聲佛有力便下疑情審問者念佛的是誰審之又
審畢竟是誰看得纔有昏散現前卽便快着精彩又
提又看又審又疑疑到疑不得處胸中如銀山鐵壁
立在心目之間如此便是話頭得力時也若到此得
力處正好重下疑情於日用一切時一切處念念不

移乃至久久夢中一似醒時一般若用力到此決不
可退墮忽然疑團迸裂自然頓見本來面目若肯發
此決定之志操不退之心但只一念直直行將去切
不可求速効切不得將心待悟若工夫綿密自有打
破時節也如上所說參究一節最是易爲省力是要
放得下提得起靠得定疑得切不拘行住坐臥動靜
閒忙都是用心的時節六祖云若論此事輪刀上陣
亦可做得此之謂也禪人有志真爲生死便從此一
路下脚

示寶藏相禪人禮普陀

觀音大士證圓通本根以法界身隨緣應現豈定居
於普陀耶海喻生死山喻涅槃大士以法身普應生
死海中卽衆生日用尋常皆大士威神顯現湛然寂
滅猶如寶山故以海中普陀象之由在衆生煩惱海
中衆生有苦卽大士之苦故一稱其名卽得解脫乃
衆生喚醒自心大士大士現前則寂滅現前寂滅則
苦不能到故山在海中波濤不能撼動是故名爲大
士常居普陀非局指海中拳石爲大士栖託也衆生
迷妄不禮自心大士親踞寂滅道場巍巍不動如海
中山爾乃跋涉山川必數千里外踰崕辛苦而向外

求之迷之甚矣雖然如是經云歸元無二方便多門
今大地衆生皆信大士於南海合就其機而引進之
令其涉海登山一呼大士猛省自心則觸目波濤皆
入圓通之門必使自信而後已同此行者但有一人
能信老人此言則不負一翻行脚不然則空費草鞋
錢也

示明輝禪人少林禮祖

若論此事佛未出世祖未西來照天照地無欠無餘
卽黃面老子出世胡亂四十九年終日搖唇鼓舌亦
未道着一字及末後拈花迦葉破顏微笑乃曰吾有

正法眼藏涅槃妙心今付與汝大似空拳誑小兒自是喚作教外別傳之道一似鉢盂安柄一人傳虛十人傳實達磨西來又說作單傳直指少室九年賺得神光癡種立雪斷臂將謂有甚奇特究竟到底直是个覓心了不可得從此承虛接響大家都架空中樓閣各立門庭二派五宗畢竟不曾爲人拈出直至如今大地黑如漆致使癡狂之輩向鬼窟裏弄精魂自謂傳少林禪是某家兒孫如此誑惑愚人豈不痛哉禪人今日叅老僧老僧此間無佛法禪道與人說甚麼乾矢橛禪人又要走向少林禮鼻祖求佛法禪道

捨卻自己脚跟下一尺土更向千山萬水之外向他
家屋裏覓豈智也哉禪人試將已躬下理會看未出
門一步與到匡山時是同是別卽今離匡山一步到
少林往返歸來時是同是別若是別則未出門一步
早已錯卻了也況千里萬里乎禪人如不信老人試
到少室問取單傳堂前露柱看是個什麼

示法界約禪人

禪人生長建昌自離塵以來久走方外曾禮紫柏及
老人於大都已三十餘年復覲老人於匡山因示之
曰從上出家兒皆爲生死大事登山涉水求善知識

決擇於一言一句之下勦絕命根將百千萬劫塵勞
惡習當下頓斷如脫鞵之鷹自此不復受人拘繫卽
能掉臂生死路頭絕無顧盼諦觀傳燈諸祖爲人抽
釘拔楔處有甚玄妙秘密耶只是學人一向單爲生
死一着蘊在胸中吞不入吐不出扼塞不通如喪考
妣相似偶因緣時熟忽遇善知識拄杖頭一撥便轉
更有何疑慮耶唯的信自心本有而已今人行脚走
徧天涯入徧叢林眼中到處熱烘烘便是好道場見
粥飯精潔一頓飽勦勦的便是好知識縱遇明眼知
識都被熱瞞當面錯過如此行脚叅方不爲本分事

便是流浪生死一生空過時光枉費草鞋錢豈不大
可嘆息耶禪人爲生死出家行脚叅知識住名山行
苦行種種法行一一經歷且道卽今生死事畢竟如
何且道前見紫柏老人今見老人與未見時有何差
別且道今在匡廬萬仞峰頭白雲深處與王舍城中
萬丈紅塵裏境界是同是別若道是同且隔三千里
外沒交涉若道是別衲僧行脚眼在甚處若向者裡
定當得出三十年卽今日今日卽三十年前紅塵卽
白雲白雲卽紅塵一切生死煩惱業行及種種差別
境界無不觸目寂滅矣其或未然今日再行脚從頭

起重到五臺峨嵋參見文殊普賢試問何等是平等
一際寂滅法門待有話會再來與老僧相見

示崇觀禪人

觀禪人往來吳楚不遠數千里來參一見則知其有
志而未能也老人愍其遠來且無可指示但因其名
乃字之曰見微以衆生生死根株微細流注妄想昏
迷而不自知故吾佛大師設觀以照之良以微非觀
照無以見生死之力大觀不涉微無以顯照用之功
力能破幽微則生死可出此特教家之極則若是衲
僧分上自有格外鉗錘但能一念如鍤壁銀山寨斷

喉無吐氣處直得死而復甦方有少分相應耳禪
人方且波流識海未能勦絕命根他時後日苟能吐
卻雜毒放下身心再來叅請有分

示六如坤公

從上諸祖教人叅禪雖有超佛越祖之談其實要人
成佛作祖耳未有欲求作佛祖而不遵佛祖之言教
者捨教而言修行是捨規矩而求方圓也且佛教阿
難開口便道應當直心淨名云直心是道場馬鳴大
師開示修行切要須發三種心謂直心正念真如法
故深心要集一切諸善行故大悲心願救一切衆生

苦故從上諸祖未有不發此三種心者學人祇知費
費的去叅話頭只要妄想貪求玄妙卻不知是直心
正念真如祖師方便法門若說真如二字學人早作
道理會取去誰肯下死工夫做若只教去看話頭看
到話頭逼拶歷劫情根忽朕斷處從來一切妄想情
慮當下消滅求一念生心了不可得到此便是離念
境界正所謂正念者無念也若到無念則不求與真
如合自狀觀體相應如此便是佛祖教人直心的樣
子也是知叅禪更無別樣巧法只是要人實實地做
做到恁般田地豈有甚秘密巧妙哉此乃第一直心

修行也第二深心要集一切諸善功德此諸善功德
不是外邊有爲的事如達磨大師對武帝云淨智妙
圓體自空寂是真實功德是知達磨所說淨智妙圓
正是馬鳴直心正念真如馬鳴所說諸功德就是將
直心正念去做以真如徧成一切有爲事法今日要
求證真如不是在死眉死眼鬼窟裡求要在一切日
用有爲萬行上求所以行上求者不是在事上別討
出一个玄妙真如來只是就將直心正念在一切事
上驗看可與直心正念相應不相應若事事法法都
與直心正念相應則目前無一法一事不是真如境

界矣所以馬祖與百丈諸弟子日用中搬柴運水鋤
田插禾燒火煮飯事事上覲面勘驗尋常一言一句
冷言熱語都是要弟子入證真如之門若勘到果朕
一切處不昧方許有爲人分若胸中絲毫未透未到
無念境界起心動念卽被業轉墮在生死窟中故未
輕許印正此傳燈千七百則葛藤皆真實印正語非
玄妙機鋒語如今學人都把作玄妙奇特言句蘊在
胸中當作已解日用頭頭未曾一毫看破豈不誤哉
第三大悲心願拔一切衆生苦如今學人見拔衆生
苦是菩薩事待他日成了菩薩纔度衆生卻不知能

度衆生方是菩薩度衆生苦不是有了神通妙用纔去度衆生卻就是直心正念集諸功德處就是度生事業且如世尊教須菩提度盡衆生寔無衆生可度乃至廣行六度更無一法可行乃至上求菩提佛果亦無所得且度衆生豈不是集諸功德實無一法可得豈不是直心正念真如如此妙用乃自己日用神通取之無禁用之不竭則何法而非功德事哉以衆生日用種種事法皆是煩惱現行今以真如一念事法法上印破都轉作真如妙用便是度自心之衆生如此叅學是名真叅實究者不是現成端坐養懶

過了三年五載便誇大口說我叅禪幾多時悟了多
少妙處如此見識都闔老子前喫鐵棒漢反不如三
家村田舍郎他倒免酬信心檀越宿債老漢看來佛
祖教人原是分分明明只是後人錯會所以誤耳禪
人旣歸心老人須信老人言從今將抱守琉璃瓶子
一搗粉碎將從前叅的都移在一片身心上向成就
衆生門頭拌卻性命去一一着寔體驗過發廣大心
能引一衆生發菩提心便是拔一衆生之苦自破一
分我執損一分煩惱消得一分我見煩惱便是證一
分眞如境界若從此以去更發長遠心卽三生十劫

劫劫生生行到煩惱消盡處便是度盡衆生處若
生煩惱一時都盡更要成甚麼佛祖

示西印淨公專修淨土

近世士大夫多尚口耳恣談柄都尊叅禪爲向上事
薄淨土而不修以致吾徒好名之輩多習古德現成
語句以資口舌便利以此相尚遂致法門日衰不但
實行全無且謗大乘經典爲文字不許親近世無明
眼知識卒莫能迴其狂瀾大可憫也大都不深于教
乘不知吾佛度生方便多門歸源無二之旨耳世人
但知祖師門下以悟爲上悟心本意要出生死念佛

豈不是出生死法耶。參禪者多未必出而念佛者出
生死無疑。所以狀者參禪要離想念。念佛專在想。以衆
生久沉妄想。離之實難。若卽染想而變淨想。是以毒
攻毒。博換之法耳。故參究難悟。念佛易成。若果爲生
死心切。以參究心念佛。又何患一生不了生死乎。惟
此淨土法門。世人以權目之。殊不知最是眞實法門。
諦觀普賢以法界爲身。修十大願。必指歸淨土。馬鳴
傳心祖師宗百部大乘。作起信論。究竟結歸西方東
土。傳燈諸祖。雖不明言淨土。但悟心旣出生死。不歸
淨土。豈成斷滅耶。永明會一大藏指歸一心。亦攝歸

淨土禪至中峰時在季世而極力讚揚西方況此法門乃本師無問自說十方諸佛共讚豈諸佛菩薩諸大祖師反不如今之業垢衆生而妄談耶淨公中年棄愛出家初叅紫柏大師授叅禪之指今于淨土一門願修而未決老人因謂之曰此事不必問人只看自家爲生死心何如若爲生死心如救頭然志要一生取辦譬若人患必死之病有人覓還丹可救一人授以海上單方足以起死回生只在病者有決定信心此可服更不必待覓還丹只服此單方頓令通身汗出絕後方甦是時始知其妙但諦信此法專心一

志至臨命終時方自知其効耳又何必問取他人勉
矣行之決不相賺

示沙彌性鎧

沙彌性鎧來叅請益老人字之曰堅忍惟佛示弟子
曰着忍辱衣名堅固鎧以鎧爲禦患之具譬夫大將
臨敵不遭矢石之患而能全身保命有必勝之功者
鎧之力也且吾沙門釋子蹈生死之場遇五欲諸魔
之大敵非忍力堅固不足以勝之故曰忍色忍欲難
忍能忍方能保全法身慧命以臻極樂之場卽吾佛
亦曰種種諸難皆當能忍況末法險道多諸患難苟

無堅忍之力又何以克全出世之業乎

示夜臺禪人

文殊菩薩住清涼山與一萬眷屬常演說法故西域沙門遙禮此山爲金色世界華嚴經云一切處文殊師利從一切處金色世界而來由是觀之文殊果常住於此山耶蓋衆生界中煩惱所集爲熱惱地若行人能開智眼達本情忘知心體合則當下清涼如是則觸目無非文殊化境步步不離清涼道場此所謂一切處文殊金色世界也夜臺禪人久住臺山夜遊故得此名今來南方行脚參禮知識是必親從文殊

指點而來如善財之南詢雖經百一十城未動脚跟
一步如前周行十方世界未離金色界中在在知識
逆順法門無非文殊智眼今見老人於五乳峰頭與
金色世界是同是別者裏辨得許你親見文殊其或
未朕再買草鞋行腳去叅叅

示省朕覺禪人

性覺禪人中歲出家遠來匡山求授具戒以有隱疾
不能久侍辭歸請益老人因示之曰身爲大患之本
衆苦所聚六道生死先要識此生死苦因所謂諸苦
所因貪欲爲本若滅貪欲無所依止是故佛說金剛

戒心地法門乃斷欲之利具出苦之舟筏也汝今幸
聞此法念念不忘心心不懈卽此便是修行之要如
圓覺經云當觀此身四大合成我今觀此堅硬歸地
潤溼歸水煖氣歸火動轉歸風諦觀四大各有所歸
今此妄身當在何處如是觀察念念不忘心心不昧
久之純熟當見此身忽脫空四大若空諸苦頓脫
卽此工夫便是出生死之第一妙訣也從上諸祖未
有一人不從叅究中來得了悟心性者未有不修而
能得利益者汝當更念此身雖苦幸存一息尚可求
能出之方若一失此身枉着袈裟則將來三途之苦

動經長劫雖欲求出不可得也故云思地獄苦發菩
提心勉之毋怠

示難名道禪人

道學人往叅老人於曹溪特爲發明金剛般若宗旨
以吾人修行不仗般若根本智生死難出狀此般若
非向外別求卽是吾人自心之本體本自具足故今
修行但求自心更不別尋枝葉佛祖教人只是返求
自心故云識心達本源故號爲沙門又云若人識得
心大地無寸土以我自心元是般若光明本來無物
但因一念之迷故日用而不知但知有此幻妄之假

我卽不知有本來常住法身卽今要悟本來法身卽就日用現前六根門頭起心動念執着我處當下照破本來無我無我則無人無人則了無衆生衆生旣空則生死根絕生死旣脫則無壽命是則四相旣除一心無寄豈非無住之妙行乎若不能當下悟只將六祖本來無物一語置在目前但見一切境緣對待生心之時便是我執就此執處一照照破則當下情忘對待心絕卽是無我無我則無人人我旣空則日用身心了無罣礙以日用逆順境界皆是生死路徑若境界看破了無罣礙則生死根株亦從此倒斷

矣如是豈非善修般若無住之妙行乎禪人有志要
出生死必以此爲第一義此外別求卽落外道邪徑
矣

示魏聖期

聖期居士頃以書來請益云某邇來雖惕於生死
大事欲隨處解脫惟橫逆忽來不能當下消受雖旋
能覺知主人已被牽纏矣觀此來意乃真切有志於
生死大事者第未遇善知識指點心地工夫故無把
柄耳蓋吾人從來只認妄想爲心不知本有佛性一
向只在世情逆順境界上起好惡憎愛種種分別知

見殊不知此等憎愛喜怒之情全是生死根株舉世之人未有不在此中一生交滾者古德教人參禪了生死不是離此別有玄妙只是在此等境界上憎愛之心看破便是了生死以此憎愛妄想從來習染純熟深厚若無方便法門豈能敵得所以叅禪看話頭之說正是破煩惱之利具耳所以被他牽纏者直爲無此話頭作主宰耳只如僧問趙州狗子還有佛性也無州曰無卽將此一無字懷在胸中作話頭下疑情念念不忘心心不昧一切閒忙動靜應酬忽遽中只提此一語重下疑情審問疑來疑去只有一个話

頭現前縱是看書纔放下書本回頭一看便下疑情
此疑堅固切不可作道理思量解會只要一个疑念
真切久久純熟但見心中妄念起時如此一問當下
冰消心中所起喜怒只是一妄想耳先有此話頭作
主宰及境界至時一到卽看破當下冰消全不用力
如此做工夫不但敵破境界抑有了悟之時但切不
可作玄妙道理思量恐反誤也

示福敦禪人

新安禪人遠叅匡山求授戒法名曰福敦字曰篤如
篤者敦篤純一無僞精誠之至也朕吾沙門佛子欲

超生死證真常求無上涅槃之福樂苟非精誠一念
純真無妄力破煩惱之魔頓拔愛憎之根而欲頓享
無爲之福難矣千里之行在於初步從此戒爲基本
乃趨菩提之初步卽此念念向前心不退單求一
念生死情根搜拔起處竟不可得狀不可得處便是
生死無着處矣第恐志不堅行不力耳若恐不力但
以阿彌陀佛四字橫于胸中以爲利斧久以根株自
斷矣如是着力是名篤如勉之勉之

示福厚禪人

新安禪人來叅匡山求授戒法名曰福厚字曰積如

蓋出世入福由漸積而厚至佛乃足猶如積微塵以
成大地厚之至也吾佛世尊從無量劫來捨頭目髓
腦積功累行乃得菩提菩提爲涅槃之安宅福樂之
極地也苟不積何以至此哉狀如者乃如如佛性吾
人本有良由積劫煩惱侵蝕故煩惱情塵日厚而如
如佛性薄矣今既知佛性本有不假他求從此日用
念念知歸但見情塵起處以智光照之久久純熟則
佛性厚而煩惱薄煩惱薄而業障輕業障輕而生死
斷是由積真如以斷生死求證菩提享常樂我淨之
厚福豈非由積而至耶故曰水之積也不厚則負大

力也無力禪人勉之

示同塵齋禪人

滇南同塵齋禪人遠至大都親歷講肆旣而盡棄所
習南叅知識遊新安之黃山愛其幽勝遂隱約其間
一鉢往來無定栖止狀以華嚴大經爲課誦壬戌仲
夏來叅匡山求授大戒拈香請益老人因示之曰子
以華嚴大經爲常課能知此經之綱宗乎惟我毘盧
遮那曠劫因中稱法界心修普賢行證窮法界名爲
報身號盧舍那具有佛刹塵數相好是爲正報所感
二十重華藏世界無盡莊嚴以爲依報安住海印三

昧稱普光明智爲地上菩薩演說此經名曰普照法
界修多羅爲稱性法門種種微妙不可思議如此法
門乃諸佛自證境界具在衆生日月用妄想心中念
念現前經云譬如一微塵中具有大千經卷書寫三
千大千世界中事有一智人明見此經剖破微塵出
此大經利益無窮狀一微塵者衆生妄想心也大千
經卷衆生本具性德也隱而不現謂衆生日用而不
知也明眼智人破塵出經卽諸佛證窮此法開示衆
生爲大利樂也是知此經所說乃說衆生日用妄想
心耳大哉衆生之心具有廣大不思議力智用無邊

而爲介爾妄想所蔽可不悲哉吾佛特爲此事出現
世間故曰爲一大事因緣故出現於世以諸佛證此
大事因此緣此特出世間爲衆生說更無別事以衆
生迷此大事而爲生死故以生死爲大事也由是觀
之卽八十卷之雄文所開示者乃吾人一念之妄想
心耳故曰我今於一切衆生心中成等正覺所謂諸
佛心內衆生時時成道衆生心內諸佛念念證真故
般若多羅尊者曰入息不居陰界出息不涉衆緣常
轉如是經百千萬億卷苟能以如是眼轉如是經盡
未來際無間斷時所謂塵說剎說熾然說無間歇此

乃華嚴法界真經之大旨也禪人若悟此法則於未展卷前徹見無邊法界於撥火拈香警歎彈指之間也雖狀如是也要牛皮鑽透始得

示修淨土法門

海陽禪人遠叅匡山求授戒法命名曰深愚拈香請益云弟子某發願求生西方淨土結法侶若干人同會一處專修淨業願乞慈悲指示法要老人因示之曰佛說修行出生死法方便多門唯有念佛求生淨土最爲捷要如華嚴法華圓妙法門普賢妙行究竟指歸淨土如馬鳴龍樹及此方永明中峰諸大祖師

皆極力主張淨土一門此之法門乃佛無問自說三
根普被四衆齊收非是權爲下根設也經云若淨佛
土當淨自心惟今修行淨業必以淨心爲本要淨自
心第一先要戒根清淨以身三口四意三此十惡業
乃三途苦因今特戒之要先須三業清淨則心自淨
若身不殺不盜不姪則身業清淨不妄言綺語兩舌
惡口則口業清淨意不貪不瞋不癡則意業清淨如
此十惡永斷三業水清是爲淨心之要於此清淨心
中厭娑婆苦發願往生安養立念佛正行狀念佛必
要爲生死心切先斷外緣單提一念以一句阿彌陀

佛以爲命根念念不忘心心不斷二六時中行住坐臥拈匙舉筯折旋俯仰動靜閑忙於一切時不愚不昧並無異緣如此用心久久純熟乃至夢中亦不忘失寤寐一如則工夫綿密打成一片是爲得力時也若念至一心不亂則臨命終時淨土境界現前自朕不被生死拘留則感阿彌陀佛放光接引此必定往生之効驗也朕一心專念固是正行又必資以觀想更見穩密佛爲韋提希說十六妙觀故得一生取辦今觀經現存若結淨侶同修任各志願於十六觀中隨取一觀或單觀佛及菩薩妙相或觀淨土境界如

彌陀經說蓮華寶地等隨意觀想若觀想分明則二
六時中現前如在淨土坐臥經行開眼閉眼如在目
前若此觀想成就臨命終時一念頓生所謂生則決
定生去則寔不去此唯心淨土之妙指也如此用心
精持戒行則六根清淨永斷惡業煩惱則心地清淨
觀念相繼則妙行易成淨土真因無外此者若但口
說念佛求生淨土若淨戒不持煩惱不斷心地污穢
佛說是人永不成就是故行人第一要持戒爲基本
發願爲助因念佛觀想爲正行如是修行若不往生
則佛墮妄語矣

示念佛參禪切要

念佛審實公案者單提一聲阿彌陀佛作話頭就于提處卽下疑情審問者念佛的是誰再提再審審之又審見者念佛的畢竟是誰如此靠定話頭一切妄想雜念當下頓斷如斬亂絲更不容起起處卽消唯有一念歷歷孤明如白日當空妄念不生昏迷自退寂寂惺惺永嘉大師云寂寂惺惺是寂寂無記非惺惺寂寂是惺惺亂想非謂寂寂不落昏沉無記惺惺不落妄想惺惺寂寂雙流沉浮兩捨看到一念不生處則前後際斷中間自孤忽狀打破漆桶頓見本來面目

則身心世界當下平沉如空華影落十方圓明成大光明藏如此方是到家時節日用現前朗朗圓明更無可疑始信自心本來如此從上佛祖自受用地無二無別到此境界不可取作空見若取空見便墮外道惡見亦不可作有見亦不可作玄妙知見但凡有見卽墮邪見若在工夫中現出種種境界切不可認着一咄便消惡境不必怕善境不必喜此是習氣魔若生憂喜便墮魔中當觀惟自心所現不從外來應知本來清淨心中了無一物本無迷悟不屬聖凡又安得種種境界耶今爲迷此本心故要做工夫消

磨無明習氣耳若悟本心本來無物本來光明廣大
清淨湛然如此任運過時又豈有甚麼工夫可做耶
今人但信此心本來無物如今做工夫只爲未見本
來面目故不得不下死工夫一番方有到家時節從
此一直做將去自朕有時頓見本來面目是出生死
永無疑矣

示海濶禪人刺血書經

禪人發心書華嚴五大部經特禮匡山請益老人因
示之曰毘盧遮那安住海印三昧現十法界無盡身
雲說華嚴經名普照法界修多羅若正報身諸毛孔

中放光明說若依報世界草芥微塵則塵說剎說如是演說盡未來際無間無歇如是之經充滿法界所謂一字法門海墨書而不盡今子以有限之身心涓滴之身血若爲而盡書之耶雖狀此經果不能書則一切衆生絕分矣且曰法界之經則凡在法界無非此經若悟毘盧以法界爲身則自己身心亦同法界此則日用現前動靜語默拈匙舉筋欬唾掉臂皆法界之大用是則何莫而非書寫此經之時耶若身同法界則一一毛孔皆悉周遍如是則舉一滴之血當與性海同枯矣所以普賢大士剝皮爲紙析骨爲筆

刺血爲墨量等法界是則全經不出一字卽書一字亦同全經何況百軸之文禪人苟能作如是觀則自書者與見聞者及禮拜讚歎一香一華而作供養乃至執勞運力者無不同歸法界如是功德豈可得而思議禪人若無如是眼作如是行亦不免捏目見空華豈不重增顛倒想耶

示曹溪沙彌能化書華嚴經

佛云佛種從緣起是故衆生正因佛性本具但以無明堅固不遇善緣終不能發如種子在地要假雨露陽和之緣方能抽芽發幹乃至開花結實耳老人未

至曹溪諸沙彌所習世俗之業且不知有佛有僧矣
知佛法哉自老人開化種種方便誘引教導始則知
爲僧矣旣而以佛性難明先教書寫華嚴大經使知
親近隨順佛法信心若發方可引入佛慧初則二三
其人自是人人相望發心不十年間書此大經者已
成十餘部六祖入滅已來千年今日之事從前所未
有也佛性人人本有恒沙功德人人本具以無知識
開導皆以性德而造惡業招三途之苦報若悟此佛
性則轉惡業而爲無量淨土莊嚴今沙彌能化能以
造業之心轉爲淨土莊嚴作成佛真因所謂智種含

于心地遇法雨慧日之緣故能發菩提芽生長善根
抽功德枝開萬行花將來必成菩提妙果此正所謂
佛種從緣起也老人徃徃開示曹溪諸弟子等若從
此人人勇猛發無上心有志佛法究明已躬大事卽
如六祖住世時發明自心者千人之中豈止三十餘
人而已耶是在遞相轉教之功耳

示惺初元禪人書經

性元禪人來叅匡山老人字之曰惺初發願書寫大
經老人因示之曰出家修行佛說方便多門固在各
各發心何如耳第一向上叅禪求明自心志了生死

次則深窮教海志願弘通護持正法續佛慧命又次則深厭生死專心淨業願生西方此皆理行爲最上者若夫事行種種至於書寫經典乃六種法師之一是佛稱讚者故法華說持經法師現世肉身得六根清淨此豈事行可擬哉且云舉手低頭皆已成佛此稱性之行又豈可以描抹點画致耶老人昔住五臺曾刺血泥金書寫華嚴大經每於書寫之中不拘字之點画大小長短但下一筆則念佛一聲如是點點画画心光流溢念念不斷不忘不錯不落久之不在書與不書乃至夢寐之中總成一片由是一切境界

動亂喧擾其心湛然得一切境界自在無礙解脫門
乃至一切見聞無非真經現前以此證之則書經之
行妙在一心不亂又豈若童蒙抹硃便以書經求功
德耶禪人試以此行如是書寫如是受持似有少分
相應若以描寫爲妙行博名高爲求供養之資則又
不若尋常粥飯爲無事僧也勉之

○示昭凡庸禪人

庸禪人往叅老人於五羊嘗示以無生之旨頃來謁
匡山見其爲道之志彌篤而叅究工夫未純以未把
作一件真實大事耳老人因示之曰古人學道第一

要爲生死心切不是要求玄妙道理也所言生死者何卽吾人日用現前種種塵勞境界中遇境逢緣若逆若順內心習氣引發現行超愛憎取捨等種種妄想分別心也以念念攀緣起善惡等種種業行都作未來生死根株以妄想無涯故生死無際所以衆生長劫流轉生死苦海無出頭時良由不知自心之過也故云若不了自心云何知正道古今學道人有志出生死者單要求明自心耳以此心一向羸浮如沸湯烈燄未常一念清冷故古人權設方便將一則公案教學人念念提持叅究如僧問趙州狗子還有佛

性也無如永明教人審實念佛的是誰卽此一無字
誰字便是斷生死命根之利劒也。狀此參究審實只
是覷此無字誰字起從何處起落向何處去只看者
一念起落處要見起滅根源若叅到極則處將一念
生滅妄想迸斷打破漆桶頓見本來面目到此便將
佛祖向上鼻孔一時盡在自己手中從此識得本來
人更不疑張三李四恰元來是自己本命元辰如是
有何玄妙可求又何必向他家屋裏求耶。狀此一着
若不是最初發心爲生死切任你做盡伎倆都是鬼
家活計。縱有一知半見都是魔說。凡有所作皆是魔。

業可惜百千萬劫難遇一段大事因緣也禪人果有志此事直須將自己胸中從前世諦伶俐聰明知見及種種妄想一齊折合歸向到一念上做將一句話頭作橫空寶劍斬斷從前妄想如斬亂絲果能如是下毒手做苦切工夫若無真實悟處則從上佛祖皆墮妄語矣所最忌者唯是無真實心只將參禪做面皮說好看話耳

示履初崇禪人

禪人生長豫章素有向上志聞老人逸老匡山遂棄世諦緣潔心來叅因留人衆隨時入室久之察其多

軟暖之習而骨氣不剛故入道之心不猛居常策其
不逮一日拈香請益老人因示之曰子有向道之志
而無振拔之氣者以心力不純故骨不勁骨不勁故
無剛毅勇猛之志所謂中無主不立耳所以中無主
者以第一無真實爲生死心故無決定久遠不退之
志旣無決定之志則一切趨操無特達之行所以因
循舊習悠悠日月但守閤散任意以爲自在無拘於
心旣不知檢而於四大幻身亦無支持之力故日用
現前全無真實工夫亦無真實受用耳從今日去先
要發一片真實爲生死心立一定久遠不退之志盡

此形壽決定要究明已躬下一段大事畢竟要齊古人方不負此生平要如古人必以一則公案爲參究話頭如永明大師念佛審實的公案最爲穩當卽將心中從前一切夙習知見妄想思筭一齊放下放到無可放處單單提起一聲阿彌陀佛卽看此念起處審實者念佛的是誰且念且審又審又念靠定一念審實得力處便覺心如墻壁究到究不得處便是得力時節如此久久參究參到心無用處如老鼠入牛角時忽朕一念迸裂便是了生死的時節也子能如是用心如此着力自朕骨剛氣猛名爲挺特丈夫視

前軟暖之狀真日切相倍矣子其勉之

示慧鏡心禪人

吾佛說法以一心爲宗無論百千法門無非了悟一心之行其最要者爲叅禪念佛而已而叅禪乃此方從前諸祖創立悟心之法其念佛一門乃吾佛開示三賢十地菩薩總以念佛爲成佛之要十地菩薩已證真如豈非悟耶狀皆曰不離念佛念法念僧善財叅五十三善知識第一德雲比丘卽單授以念佛解脫門及至末後叅見普賢爲入妙覺善知識乃專回向西方淨土云親覩如來無量光現前授我菩提記

由是觀之卽華嚴爲最上一乘而修稱法界行始終
不離念佛十地聖人已證眞如尚不離念佛而求法
妄人乃敢謗念佛爲劣行又何疑叅禪念佛爲異耶
是闕多聞不知佛意妄生分別耳若約唯心淨土則
心淨土淨故初叅禪未悟之時非念佛無以淨自心
狀心淨卽悟心也菩薩旣悟而不捨念佛是則非念
佛無以成正覺安知諸祖不以念佛而悟心耶若念
佛念到一心不亂煩惱消除了明自心卽名爲悟如
此則念佛卽是叅禪若似菩薩則是悟後不捨念佛
故從前諸祖皆不捨淨土如此則念佛卽是叅禪叅

禪乃生淨土此是古今未決之疑此說破盡而禪淨分別之見以此全消卽諸佛出世亦不異此說若捨此別生妄議皆是魔說非佛法也

示修六逸關主

余初度嶺至五羊時菩提樹下弟子修六逸公卽相率同輩歸依乃至出嶺之南嶽遊吳越相從於艱難困苦中始終二十五年未嘗少間及余歸隱匡廬公素爲生死心切志求向上亦相從於金輪峰頂閉死關三年單提一念幸有自信之地今以省師歸故山拈香請益老人因示之曰出家爲生死求向上一路

乃本分事禪人死關三年其於放下身心抖擻客塵煩惱消磨習氣乃最初一步業已自信但於參究生死病根未能頓拔以參禪先須識取生死病根方能用藥調治耳何謂生死病根以貪瞋癡慢皆以我見而爲根本一切聖凡二種生死皆因執我朕我依見立是則妄見乃我執之本稱爲法身之刺見刺不拔生死難出是以一切凡夫執身心人我是非之見一切外道橫執邪見二乘聖人執生死涅槃欣厭取捨之見一切菩薩執有生可度有佛可求之見等覺聖人未忘佛見法見故有二愚乃至祖師門下初學參

禪者則多先起待悟之見於未悟中妄起未得謂得之見及有一念狂心暫歇處卽執爲妙悟便生得少爲足之見卽將古人言句攀扯回爲己解執爲玄妙之見以此蘊集於懷不肖唾卻久之釀成毒藥以致悞墮邪見縱有一念頓悟自心本來無物則又墮在光影門頭以爲究竟之見所以雲門道只饒得到法身爲法執不忘己見猶存墮在法身邊謂之抱守竿頭則永無超脫之見總之但有絲毫情見未除皆是生滅邊收通是生死病根縱狀悟得尚屬生死故云悟之一字亦須唾卻何況全未了悟但依稀恍忽便

起知見自以爲得卽將古人現成語句把作自己妙
悟此皆墮自欺全非真參實究功夫如此用心皆是
未識生死病根之過也所以古德云不用求真唯須
息見苟知見消亡不真何待所以佛示阿難云見見
之時見非是見見猶離見見不能及此其究竟窮元
單以見爲生死病根以從法身而起妄見見有身心
世界而沉生死故今以離見爲出生死證法身之極
則也馬鳴大師示人以離念爲真修實證以因念有
見若見謝則念自離妄自泯矣是知貪瞋煩惱之病
根淺唯獨見刺之病根深最爲難拔故參究工夫煩

惱易斷習氣難除習氣不除則妄見潛滋妄見滋則縱有悟處皆成習氣以成魔見矣所以楞嚴經中說見魔最深隱而難知也禪人有志真參寔究直須看破切不可墮在知見網中正當做工夫時只將趙州無字與六祖本來無一物同參於未提起時先將身心內外一齊放下放下又放下放到無可放處透底看者無字畢竟有什麼氣息纔有一念起處當下一覷覷定看他畢竟是个甚麼如此安身立命在話頭上靠定深錐痛劄一念不移如老鼠咬棺材自有透脫時也切不可將古人公案言句蘊在胸中將來比

擬以擬心卽錯決不是古人見處至於尋常應緣時
只將話頭靠定歷歷孤明自朕不被境風搖奪乃至
與人接談時切不可將古人公案作自己知見以資
談柄此一種病根最深以正當說時直圖爽快全不
知不是自己本分事以此縱心矢口全不曾回頭照
看所以不知是病若養成此病則將爲大我慢魔乃
狂魔之所攝持今日中所見緇白好禪者比比皆朕
不可不懼也古人叅禪無別玄妙只是肯將凡情聖
解一齊掃卻放得胸中空落落不留絲毫知見作主
宰知見不存則真見發光自朕了無一物矣如此放

下時則當人一念如大火聚一切塵情習氣一觸便
燒如紅爐片雪絕無影跡可留回觀一切知見邊事
如說夢耳所以道叅禪無訣法只要放得下若放下
一念則一念真實若念念放下則念念真實若徹底
放下則盡未來際徹底真寔矣公行矣能不忘此叮
嚀之言則與老人眉毛撻結未常有絲毫間隔時也
嗟嗟老人老矣儻負此緣錯過此生則再求今日之
緣又不知幾千萬劫也

示慧玄興後禪人

東海佛法不行之地自靈山桂峰師開化令捨邪歸

正者不少老人昔居海印寺歎師法利之盛其諸弟子能說法者居多今學人興後乃嫡孫也老人別靈山二十有八年矣辛酉歲後來叅匡山改歲後辭歸故山請益修心法要老人因示之曰佛最所訶者煩惱所知二種障爲生死根本狀煩惱障乃貪瞋癡愛爲凡夫生死根本所知障乃佛法知見爲三乘聖人生死根本苟二障不除則衆苦無由得出也嗟今世人不知佛法者固無足怪卽學佛法人不斷除煩惱又以所學佛法爲所知障生長我慢重增煩惱心地染污種子觸發現行放逸身心毫無檢束循情造業

豈非大謬耶學人今聞老人開示知爲生死大事發
心參求本地工夫此乃最勝願力但今參究工夫不
用別求只要將胸中舊有習氣種子一一打點乾乾
淨淨不許觸發現行就於日用對境逢緣起心動念
處當下看破不許相續其用心下手只如楞嚴經所
說觀音耳根圓通旋倒聞機返聞自性一則觀門最
好用心若於日用見聞處果能返觀自性則不隨外
境流轉如此念念返流則念念是歸真之路如此用
心若習氣不除觸發現行定不得力此全在達現業
一着爲最上行也狀又必要爲生死心切乃肯下死

工夫耳學人實爲生死真切用心乃有受用不是說了便休作一種佛法知見也

示淨心居士

往老人過吳中淨心居士叅禮請益老人示之以念佛法門以念佛如水清珠能清濁水故以淨心爲道號別數年矣今書來云念佛難成一片復請開示老人因示之曰修行第一要爲生死心切生死心不切如何敢云念佛成片且衆生無量劫來念念妄想情根固蔽卽今生出世何曾一念痛爲生死日用念念循情未常返省今欲以虛浮信心就要斷多劫生死

所謂滴水救積薪之火豈有是理哉若果爲生死心切念念若抹頭然只恐一失人身百劫難復要將此一聲佛咬定定要敵過妄想一切處念念現前不被妄想遮障如此下苦切工夫久久純熟自朕相應如此不求成片而自成一片矣此事如人飲水冷煖自知告訴不得佗人全要自己着力若但將念佛做面皮如此驢年無受用時直須勇猛更莫遲疑

示仁天老宿持法華經

仁天大德誦法華經二十餘年將行請益因謂之曰法華最上一乘乃吾佛久秘之要爲授記諸弟子之

券書也六祖云心迷法華轉心悟轉法華誦經不解
意與義作譬家二十七祖云入息不居陰界出息不
涉衆緣常轉如是經百千萬億卷如上一二祖所說仁
天畢竟如何持此經耶經云是法非思量分別之所
能解如是則六祖縱許解意亦未能持又云此經開
方便門以示諸法真實之相如是則山河大地草木
瓦石無非實相縱若二十七祖離出入息亦未能持
狀則仁天畢竟如何持耶如佛所說持品乃至展轉
第五十人轉教持經功德不可思議由是觀之轉教
之功不論解義不解義離息不離息但能一念信心

自知本有則慧命不斷由是老人最讚青蓮法社以持法華爲妙行也以一聞此經便下成佛真種仁天以此轉教多人能如佛所讚歎更有何法過于是乎示沈大潔

禪淨二行原無二法永明大師示之於前矣禪本離念固矣狀淨土有上品上生未常不從離念中修若曰念佛至一心不亂豈存念耶但此中雖是無二至於下手做工夫不無巧拙以叅究用心處最微最密若富叅究時在一念不生若云念佛則念又生也如此不無兩橛念就叅究念佛處打作一條要他不生

而生生卽不生方是永嘉惺寂雙流之實行也何耶
若論參究提話頭堵截意根要佗一念不生如此雖
是參的工夫古人謂抱樁搖櫓只者要佗不生的一
念是生也豈是真不生耶只如念佛若將一聲佛號
掛在心頭念念不忘豈是真一心不亂古人教人參
活句不參死句正在生處見不生意如經云見剎那
者方悟無生卽此一語則參究念佛當下可成一條
矣道人諦聽參究念佛此中易落滑譌不可忽也如
何參究卽念佛念佛卽參究耶如今參究就將一句
阿彌陀作話頭做審實工夫將自己身心世界并從

前一切世諦俗習語言佛法知見一齊放下就從空
空寂寂中着力提起一聲阿彌陀佛歷歷分明正當
提起時就在直下看覷審實此念佛的是誰重下疑
情審之又審疑之又疑如驢覷井覷來覷去疑來疑
去疑到心思路絕處如銀山鐵壁無轉身吐氣處是
時忽怱磕着觸着真無生意忽怱猛的現前時則通
身汗流如大夢覺到此方信生卽無生無生卽生叅
卽是念念卽是叅回頭一看始知向來如在含元殿
裏覓長安也如此做工夫最怕將心要悟才有要悟
的心便是攔頭板也只管一直做將去不計工程卽

到做不得時則打起精彩又從新做起又切不可貪
求玄妙卽有一念暫息寂靜歡喜切不可當作好處
直須吐卻切不可將佛祖玄言妙語來作證當作佛
法又不可墮在無事甲中以此爲得總之一切聖凡
迷悟都不管單單只是追求一念下落追到極盡幾
絕處久久自見本來面目如十字街頭見阿爺更不
何人問覓也看來此事元是人人本分上事更無甚
奇特處道人真真實實爲生死大事試從此下手決
不相賺

示本懷印禪人

昔吾佛於靈山會上欲以妙法華經付囑有在令於末世受持廣宣流布無論人天百萬卽得授記諸弟子竟無一人敢於娑婆世界流通此法者必待地涌之衆乃能荷擔持此法者豈易易哉以五濁惡世衆生薄福其性剛強最難調伏是以吾佛教持經者必以忍辱爲第一行故曰如來滅後欲爲四衆說是經者應入如來室着如來衣坐如來座乃可爲衆廣說此經如來室者一切衆生中大慈悲心是如來衣者柔和忍辱心是如來座者一切法空是安住是中狀後以不懈怠心乃可爲衆說是法華經故佛自述其

往昔求法之行如提婆達多世世之冤害及常不輕之禮拜四衆乃至辱罵或加刀杖瓦石種種苦事皆歡喜忍之無一念懈怠此正教菩薩法末世持經之最勝行吾徒爲佛子苟無忍行又何以持佛慧命使不斷哉及授付囑持經之菩薩則誓之曰種種苦事皆當能忍是以佛說觀三千大千世界無有如芥子許不是菩薩爲求菩提捨身命處乃至頭目髓腦無有吝惜故教持經者先以忍行悲此法末非大忍力又何能護佛法續慧命乎老人每每以忍行開示禪人禪人能篤信老人亦能以忍力自持今不但卒保

道場抑且成就已行切不可。以世諦尋常觀之。更於此外。別求生死法也。且此經乃吾佛世尊爲一大事。因緣故。出現於世。一大事者。乃衆生本有佛之知見也。佛知見者。以能見諸法實相也。以衆生迷真知見。但認五蘊幻妄身心。而不見真實之相。若見實相。則三界上下了無一法。又何生死可寄耶。如此豈獨叅禪能了生死。而持經不能了生死乎。若南岳天台皆悟實相之大宗師。儻法社諸侶。讀誦此經。能有一人如天台。悟入法華三昧者。卽此靈山一會儼然未散。如是則護持之人具足恒沙功德。不可思議矣。佛爲

此法劫劫生生捨此身命禪人卽能捨此一生成大法益又何外慕別求佛法乎今縱不能了生死卽仗此法爲舟航願力持之於生死海中亦必終有到彼岸時猶勝從前虛生浪死也禪人旣信老人語從此發起大忍力大精進力是名真法供養如來以成普賢大行切不可起生滅心立人我見而生退墮之想也

示新安仰山本源覺禪人

本源覺重興仰山道場三十餘年幻出種種莊嚴皆自心力誦圓覺梵行二經亦二十餘年精持淨行皆

從宿習般若中今禮匡山請授大戒拈香請說圓覺
大義老人因示之曰佛說三界上下法唯是一心作
所謂圓覺流出一切清淨真如菩提涅槃及波羅密
教授菩薩是故爲佛弟子若達唯心法門則一切染
淨因果皆卽現前念念轉變故曰心淨則佛土淨直
如仰山因緣向皆危石巉嵒荒榛茂草今一旦幻此
道場如從天至皆從最初一念堅固信心故致如斯
廣大佛事由是觀之則西方淨土又豈從心外得耶
老人今爲禪人特授梵網金剛寶戒此戒名爲毘盧
遮那心地法門經云若授佛戒卽入諸佛位是知一

念信心卽開佛知見一切佛土應念現前故諸佛淨土皆從金剛心地建立禪人果能了知此法門從此向前日用頭頭一切運爲明明了知皆從自心流出則法法皆爲淨土真因更能將一聲阿彌陀佛念念不忘心心不昧念至動靜無二寤寐如一則現前步步皆踏淨土寶地經行卽此身心已坐蓮華胎中直至臨命終時纔捨此身卽花開見佛如從夢覺到此始知生死如夢淨土如幻一念之間永居不退此外更有何法出生死乎禪人久修梵行第未親聞善知識打破從前妄想夢但了法法唯心何用別求佛法

努力珍重

示陳善人

楚沔稱名郡故文憲之邦但法門善知識過化者希觀智禪人杖錫於此掩關三年一時向化者衆適來善人乃舊歸依信心弟子也遠叅匡山老人爲求開示以傳白大衆老人因示之曰在家男女能持五戒謂不殺不盜不邪淫不妄語不飲酒食肉佛在世時常在法會稱優婆塞優婆夷此云近事男女以堪親近承事三寶故其所修者精持五戒免墮三途苦趣是爲天人之福故曰五戒不持人天路絕若持五戒

第一要明信因果善惡報應如影隨形謂作善因福果定生人天若造惡因惡果必墮三途苦趣且觀世之高官尊爵富貴榮華者此等必是前世修福供養三寶齋僧布施印經造像修寺建塔濟貧拔苦之所感招其長壽多男父慈子孝夫唱婦隨兄弟恭者必定從放生不殺持齋戒中來在家有能持此五戒者卽五常備矣謂不殺仁也不盜義也不邪淫禮也不妄語信也不飲酒智也儒門能此者卽成德之君子矣持齋豈分外事耶其中有上智高明之士旣持此戒復念人世無常如風中燭怕生死苦一失人身

萬劫難復如此思惟念生死苦求出離心切更宜發
心持念阿彌陀佛將此一句佛橫在胸中心心不斷
念念不忘朝暮禮佛誦經回向西方求生淨土若念
佛念到一念純熟一心不亂臨命終時見阿彌陀佛
放光接引投托蓮花以爲父母花開見佛從此永出
生死輪回之苦長揖三界是名菩薩此念佛功夫古
今在家男女行持一生取辦生西方者不少故曰唯
有徑路修行但念阿彌陀佛此外別求皆爲邪見邪
行矣善人持此轉化同類一人一家以及一鄉一郡
通都爲佛國矣但願努力修行只要信心真切一念

奉行不必別求玄妙佛法

示盛蓮生

老子云吾所大患爲吾有身若吾無身吾有何患圓覺經云我今此身四大合成當觀身中堅硬歸地潤涇歸水煖氣歸火動轉歸風四大各離今者妄身當在何處如此諦觀此心久久純熟身相忽空種種煩惱皆從妄想顛倒而生如夢顛倒本來不有當煩惱時直觀此心妄想從何處生追到本無生處則妄想不生妄想不生則煩惱空身心忽空則一切煩惱當下消滅應念卽入清涼極樂國矣此觀喫緊乃脫苦

之妙藥狀初心觀未易成但將阿彌陀佛審實話頭
切切不可忘若妄想起時提起話頭一撥則妄想自滅
以尋常無有正念故專逐妄想流轉攀緣不停以滋
苦耳一切諸法皆自心生心外無法若不觀心而求
脫苦之路猶卻步而求前也只須發勇猛心切不可
說不能乃自画耳

示吳啟高

啟高久歸三寶齋心有年今來匡山求授戒法爲法
門弟子以結未來出世之緣因詔名福常號淨心居
士爲授優婆塞戒復拈香請益老人因示之曰一切

世間種種業行皆是無常盡爲苦因故感生娑婆國土衆生所聚故名堪忍愚迷之人以苦爲樂轉滋貪愛更增苦本不知出苦之要是爲顛倒故舉世之人但有一念知是無常苦空發心求出離者是卽大智慧人但有一念返省發起厭苦之心便是出苦之路但有一念求生淨土之願卽是成佛之本所以佛說戒法教人止惡修善以惡止則心淨善修則苦滅苦滅則福增心淨則爲淨土之因苦滅則爲極樂之本福增則爲常樂之果是知一念發起受戒之心則衆苦可斷衆福可集生死可出淨土可生皆從最初一

念發心爲因地也居士今日既能知此事發此心故
凡所作卽是出世之行雖未出家卽名佛子從今果
以持戒之心念佛淨除心中夙染貪瞋癡愛種種煩
惱則心地清淨以此淨心念佛念念不忘心心不斷
卽日用現前事事皆是淨土之因卽所施種種四事
供養三寶者皆爲莊嚴淨土之資所謂心淨則佛土
淨唯心淨土自性彌陀元不離當人一念是爲真實
法行所謂真常之福從淨心中謂是故也居士果能
諦信不疑何用別求佛法但不可作世間尋常事目
之則道念自堅信心日長矣珍重珍重

示無知鑑禪人

出家人先須要知出家割愛辭親本爲求出生死若爲生死大事要知世間一切諸法皆是苦本身是苦聚必要發心修行求出苦之道先須看破現在身心境界當觀此身乃地水火風四大假合成形四大各離今者妄身當在何處如此看破則不爲此身謀求種種受用之樂次要看看破現前見聞知覺全是妄想用事總非真心以此妄心造種種業起心動念無非是業無非是罪卽此一念便是生吃苦本切不可隨佗妄想流轉日用密密觀察妄想起處就要看破當

下消滅切不可隨佗相續攀緣往而不返若觀察不定無巴鼻時但將一聲阿彌陀佛作話頭緊緊抱定念念不忘有此話頭作主但見妄想起處卽提起佛來是爲正念現前則妄念不待遣而自消矣如此二六時中密密用心唯此一念爲主其餘一切妄想皆爲客客主若分久久純熟則妄想自消真心自顯矣禪人若果有志爲生死大事但以此一念爲真其餘世間種種伎倆作詩寫字乃至攀緣交遊放浪皆是顛倒癡迷之事也若不慕實行專事虛浮縱放六情遊談無根空喪光陰不唯虛生浪死抑恐惡業難逃

千生百劫無出頭時也

示徐清之

佛說三界上下法唯是一心作言三界上者乃出世四聖謂佛菩薩聲聞緣覺也三界下者乃六道凡夫謂天人修羅三善道及地獄畜生餓鬼三惡道也是則十法界中一切聖凡善惡因果依正莊嚴皆由一心之所造狀此一心非別乃吾人日用現前分別了知之心也既狀一切由心非次第造乃日用現前一念所作之業於十法界流轉若一念由貪瞋癡所作十惡身三口四意三惡業則就三途苦趣之因若一

念轉十惡而爲十善則爲人天妙樂之因若一念善惡兩忘內不見有我外不見有人一心寂靜則爲聲聞出苦之因若觀目前苦樂逆順由因緣生滅流轉還滅則成緣覺之因若一念了知人法無我因緣性空無有作受者而不妨現行布施持戒忍辱六道之行化度衆生則爲菩薩之因若一念頓悟自心本來光明廣大無不包容無不濟度了無一法當情生佛平等卽爲成佛之因故此一心廣大無外本來清淨圓滿光明若日用念念悟此則雖居塵勞而爲出世之人矣此所以維摩稱爲不二法門也居士若能體

此而行則一切恩怨是非人我煩惱情根應念化成
光明藏矣日用一切境界試此觀看念念覺察若不
能安忍爲煩惱之所障礙纔見起處卽將六祖本來
無物一句提起如金剛王寶劒則一切煩惱當下冰
消身心化作清涼池矣如此力行若能精進不退則
頓證大解脫場又何此外別求佛法哉

示若曇成禪人

成禪人約同志於金沙之東禪結青蓮社以持誦法
華經爲業凡入社者必先熟讀此經能背誦而後入
堂不數年間能持者數十輩去住不一唯禪人一志

不移遂以此爲盡形壽焉請益老人因示之曰此經乃吾師釋迦世尊特爲開示衆生佛之知見爲成佛真種故述其往因謂於大通智勝佛時爲十六王子得聞此經展轉傳持故凡曾從聞者必生生世世共生一處以持此經爲行故昔受化者直至今生於靈山會上各各授記成佛乃的示此經爲成佛正因真種也故委明持經之法師卽於現世父母所生六根必得清淨如經具明金口親宣非虛語也此經自入中土受持者多獨南岳思大禪師所悟精深天台智者大師讀誦此經乃見靈山一會儼狀未散思大師

上此法華三昧也非子莫證非我莫識故天台因之
建立止觀妙門發明百界千如實相之旨向後依止
觀而悟明一心者如永嘉而下非一人也是知此經
爲成佛之妙行明矣唯六祖云心迷法華轉心悟轉
法華此又示持此經者第一義門禪人今持此經試
向未展卷軸已前突開頂門正眼爍破無明諸法實
相觸處洞然則見色聞聲目前現證嘗轉如是一卷
真經頓將八識田中歷劫已來愛憎煩惱種子盡化
爲光明藏如是受持是真精進是名真法供養如來
若徒以紙墨文言爲妙法以循行數字爲持經而心

地未淨煩惱未空此何異以水泡爲摩尼以蒸沙爲飯本如是則牛皮未透豈圖遮眼而已耶

示觀智雲禪人

學道人以等心死誓爲出生死第一義又放下爲入道之要古人云志當歸一久而不退佗日必知妙道所歸此五乳爲老人歸真之所禪人歸依老人之心一生居半今幸有此卓錫之地正是爾等放捨身命處生則同修死則同歸爾當放下諸緣一心寂靜於此集二三同志老者專心念佛精修淨業誓死爲期則法道常存慧命不斷是不負歸依之念也應念爾

祖樂天公與老人有三世之誼自當以義爲質經年
二念若別存一念則非真實爲生死人凡居常務要
以法爲懷綱維叢林調和大衆內外一體賓主一心
兼忘人我勦絕是非了得煩惱本空便是出生死路
卽此心地清涼便是淨土之要門也爾其勉哉勗哉
示凝畜通禪人

佛祖修行之要唯有禪淨二門兼以萬行莊嚴是爲
正修行路比來學人叅禪者多被邪師過謬引入邪
見稠林墮我慢魔增外道種是大可憂況十無一人
得解脫處似此不唯自誤抑且誤人可不思哉是故

老人極力主張淨土真修世人不知都輕視爲尋常
不知念佛之妙故多錯誤耳且念佛卽是叅禪更無
二致凡念佛時須先將自己胸中一切煩惱妄想貪
瞋癡愛種種雜亂念頭一齊放下放到無可放處單
單提起一聲阿彌陀佛歷歷分明心中不斷如線貫
珠又如箭筈相拄中間無一毫空隙處如此着力靠
定於一切處不被境緣牽引打失如此日用動中不
雜不亂夢寐如一如此用心念到臨命終時一心不
亂便是超生死淨土之時節也若但口說念佛心地
不淨妄想不除只道念佛不靈驗如此縱到三生六

十劫亦無出頭分爾其勉之

憨山老人夢遊集卷四

終